

四庫全書

集部

欽定四庫全書

集部

石倉歷代詩選卷十一

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣盧燧

謄錄監生臣顧維琳

欽定四庫全書

石倉歷代詩選卷十一

明 曹學佺 編

隋詩

煬帝

諱廣隋文  
皇帝第二子

飲馬長城窟行示從征羣臣

肅肅秋風起悠悠行萬里萬里何所行橫漠築長城北  
河東武節千里捲戎旌山川互出沒原野窮超忽擬金

白馬篇 卷十一  
止行陣鳴鼓興士卒千乘萬騎動飲馬長城窟秋昏塞  
外雲霧暗關山月綠巖驛馬上乘空烽火發借問長城  
候單于入朝謁濁氣靜天山晨光照高闕釋兵仍振旅  
要荒事方舉飲至告言旋功歸清廟前

白馬篇

白馬金貝裝橫行遼水傍問是誰家子宿衛羽林郎文  
犀六屬鎧寶劍七星光山虛弓響徹地迴角聲長宛河  
推勇氣隴蜀擅威強輪臺受降虜高闕剪名王射熊入

飛觀校獵下長楊英名欺衛霍智策蔑平良島夷時失  
禮卉服犯邊疆徵兵集薊北輕騎出漁陽進軍隨日暈  
挑戰逐星芒陣移龍勢動營開虎翼張衝冠入死地攘  
臂越金湯塵飛戰鼓急風交征旆揚轉鬪平華地追奔  
掃鬼方本持身許國况復武功彰會令千載後流譽滿  
旂常

錦石檮流黃二首

漢使出燕然愁閨夜不眠易製殘燈下鳴砧秋月前

今夜長城下雲昏月應暗誰見倡樓前心悲不成慘

江都宮樂歌

揚州舊處可淹留臺榭高明復好遊風亭芳樹迎早夏  
長皋麥隴送餘秋淥潭桂楫浮青雀果下金鞍躍紫騮  
綠觴素蟻流霞飲長袖清歌樂戲州

東宮春

洛陽城邊朝日暉天淵池前春燕歸含露桃花開未飛  
臨風楊柳自依依小苑花紅洛水綠清歌宛轉繁絃促

長袖逶迤動珠玉千年萬歲陽春曲

江都夏

黃梅雨細麥秋輕  
楓樹蕭蕭江水平  
飛樓綺觀軒若驚  
花簾羅幃當夜清  
菱潭落日雙鳬舫  
綠水紅妝兩搖漾  
還似扶桑碧海上  
誰肯空歌採蓮唱

雲中受突厥主朝宴席賦

鹿塞鴻旗駐龍庭  
翠輦回羶帷望風舉  
穹廬向日開  
呼韓頓顙至屠耆接踵來  
索辮擎羶肉韋韞獻酒杯  
如何

漢天子空上單于臺

宴東堂

雨罷春光潤 日落暝霞暉  
海榴舒欲盡 山櫻開未飛  
清音出歌扇 浮香飄舞衣  
翠帳全臨戶 金屏半隱扉  
風花意無極 芳樹曉禽歸

臨渭源

西征乃屆此 山路亦悠悠  
地幹紀靈異 同穴吐洪流  
湍觴何足擬 浮槎難可儔  
驚波鳴澗石 澄岸瀉巖樓  
滔滔



下狄縣森森肆神州長林嘯白獸雲徑想青牛風歸花  
葉散日舉煙霧收直為求人隱非窮轍迹遊

捨舟登陸示慧日道場玉清玄壇德衆一首

天淨宿雲卷日舉長川旦颺洒林花落逶迤風柳散孤  
鶴近追羣啼鶯遠相喚蓮舟水處盡畫輪途始半江漣  
各自遙東西竝興嘆已熏禪慧力復藉金丹捍有異三  
川遊曾非四門觀於焉履妙道超然登彼岸

謁方山靈巖寺

梵宮既隱隱靈岫亦沈沈平郊送晚日高峰落遠陰迴  
旛飛曙嶺疎鐘響畫林蟬鳴秋氣近泉吐石溪深抗迹  
禪枝地發念菩提心

晚春

洛陽春稍晚四望滿春暉楊葉行將暗桃花落未稀窺  
簷燕爭入穿林鳥亂飛惟當關塞者溽露方霑衣

悲秋

故年秋始去今年秋復來露濃山氣冷風急蟬聲哀鳥

擊初移樹魚寒欲隱苔  
斷霧時通日殘雲尚作雷

冬夜

不覺歲將盡已復入長安  
月影含冰凍風聲淒夜寒  
江海波濤壯峭潼坂險難  
無因寄飛翼徒欲動和鑾

持楫篇賜吳絳

舊曲歌桃葉新妝艷落梅  
將身倚輕楫知是渡江來

憶韓俊娥

不信長相憶絲從鬢裏生  
閒來倚樓立相望幾含情

效劉孝綽雜憶詩二首

憶睡時待來剛不來卸妝仍索伴解珮更相催博山思  
結夢沈水未成灰

憶起時投籤初報曉被匿香黛殘枕隱金釵裊笑動上  
林中除却司晨鳥

姚察

吳興人

遊明慶寺悵然懷古

地靈居五淨山幽寂四禪月宮臨鏡石花讚繞峯蓮霞

暉間旂影雲氣合爐烟迥松高偃蓋水瀑細分泉含風  
萬籟響裊露百花鮮宿昔尋真趣結友亟留連山庭出  
蘿蘿澗沚濯潺湲因斯事熏習便得息攀緣何言遂雲  
雨懷此悵悠然徒有南登望會逐東流旋

賦得笛

作曲是佳人製名由巧匠鵠絃時莫竝鳳管還相向隨  
歌響更發逐舞聲彌亮宛轉度雲窗逶迤出黼帳長隨  
畫堂裏承恩無所讓

李德林

字公輔博陵安平人

相逢狹路間

天衢號九經冠蓋恒縱橫忽逢懷刺客相尋欲逐名我  
住河陽浦開門望帝城金臺遠猶出玉觀夜恒明  
羞大官膳酒釀步兵營懸牀接高士隔帳授諸生  
流水琴前韻飛塵歌後輕龍軒照人轉驥馬噓天明  
入門俱有說至道勝金羸出門會親友天官奏德星  
少婦南山下擊缶和秦箏羣賓莫有戲燈來告絕纓

從駕巡遊

大夏堯遺俗汾河漢豫遊  
今隨龍駕往還屬雁飛秋天  
行肅輦路日馭翼華輶朝乘六氣辨夕動七星旒谷靜  
禽多思風高松易秋遠林才有色遙水漫無流京華佳  
麗所目極與雲浮但覩凌霄觀詎見望仙樓鏤門皆秀  
發鴛池盡學優待君草封禪東山觀射牛

夏日

夏景多煩蒸山水暫追涼  
桐枝覆玉檻荷葉滿銀塘輕

扇搖明月珍簟拂流黃壺盛仙客酒瓶貯帝臺漿才人  
下銅雀侍妓出明光歌聲越齊市舞曲冠平陽微風動  
羅帶薄汗染紅妝共欣陪宴賞千秋樂未央

楊素

字處弘  
農華陰人

出塞二首

漠南胡未空漢將復臨戎飛狐出塞北碣石指遼東冠  
軍臨瀚海長平翼大風雲橫虎落陣氣抱龍城虹橫行  
萬里外胡運百年窮兵寢星芒落戰解月輪空嚴譙息



夜斗駢角罷鳴弓北風嘶朔馬胡霜切塞鴻休明大道  
暨幽荒日月同方就長安邸來謁建章宮

漢虜未和親憂國不憂身握手河梁上窮涯北海濱據  
鞍獨懷古慷慨感良臣歷覽多舊迹風日慘愁人荒塞  
空千里孤城絕四鄰樹寒偏易古草衰恒不春交河明  
月夜陰山若霧辰雁飛南入漢水流西咽秦風霜久行  
役河朔備艱辛薄暮邊城起空飛胡騎塵

山齋獨坐贈薛內史二首

卷十一  
居山四望阻風雲竟朝夕深溪橫古樹空巖卧幽石日出遠岫明鳥散空林寂蘭庭動幽氣竹室生虛白落花入戶飛細草當階積桂酒徒盈樽故人不在席日暮山之幽臨風望羽客

巖壑澄清景景清巖壑深白雲飛暮色綠水激清音澗戶散餘彩山窗凝宿陰花草共榮映樹石相陵臨獨坐對陳榻無客有鳴琴寂寂幽山裏誰知無悶心

贈薛內史

耿耿不能寐京洛久離羣橫琴還獨坐停杯遂待君待  
君春草歇獨坐秋風發朝朝惟落花夜夜空明月明月  
徒流光落花空自芳別離望南浦相思在漢陽漢陽隔  
隴岑南浦達桂林山川雖未遠無由得寄音

何妥

字栖鳳  
西城人

八塞

桃林千里險候騎亂紛紛問此將何事嫖姚封冠軍回  
旌引流電歸蓋轉行雲待任蒼龍傑方當論次勲

長安道

長安狹斜路縱橫四達分車輪鳴鳳轄箭服耀魚文五陵多任狹輕騎自連羣少年皆重氣誰識故將軍

劉臻

字宣摯沛國相人

河邊枯樹

奇樹臨芳渚丰死若龍門疾風摧勁葉沙岸毀盤根將軍猶未坐匠石不曾論無復凌雲勢空餘激浪痕可嗟  
推折盡詎得上河源

盧思道

字子行  
范陽人

有所思

長門與長信憂思竝難任  
洞房明月下空庭綠草深  
怨歌裁潔素能賦受黃金  
復聞隔湘水猶言限桂林  
淒淒日已暮誰見此時心

日出東南隅行

初月正如鉤懸光入綺樓  
中有可憐妾如恨亦如羞  
深情出艷語密意滿橫眸  
楚腰寧且細孫眉本未愁  
青玉

勿當取雙銀詎可留會待東方騎遙居最上頭

權歌行

秋江見底清越女復傾城方舟共採摘最得可憐名落  
花流寶珥微吹動香纓帶垂連理濕權舉木蘭輕順風  
傳細語因波寄遠情誰能結錦纜薄暮隱長汀

美女篇

京洛多妖艷餘香愛物華俱臨鄧渠水共採鄴園花時  
搖五明扇聊駐七香車情疎看笑淺嬌深盼欲斜微津

染長黛新溜濕輕紗莫言人未解隨君獨問家

河曲遊

鄴下盛風流河曲有名遊應徐託後來車馬踐芳洲  
丰茸雞樹密遙裔鶴煙稠日上疑高蓋雲起類重樓  
金羈自沃若蘭棹成夷猶懸匏動清吹采菱轉艷謳  
還珂響金埒歸袂拂銅溝惟畏三春晚勿言千載憂

城南隅讌

城南氣初新才王邀故人輕盈雲映日流亂鳥啼春花

飛北寺道絃散南漳濱舞動淮南袖歌揚齊后塵駢鑣  
歇夜馬接軫限歸輪公孫飲彌月平原讌浹旬即是消  
聲地何須遠避秦

蜀國絃

西蜀稱天府由來擅沃饒雲浮玉壘夕日映錦城朝南  
尋九折路東上七星橋琴心若易解令客豈難要

採蓮曲

曲浦戲妖姬輕盈不自持擎荷愛圓水折藕弄長絲珮



動裙風入妝消粉汗滋菱歌惜不唱須待暝歸時

贈李若

初發清漳浦春草正萋萋今留素漣曲夏水已成蹊塵  
起星橋外日落寶壇西庭空野煙合巢深夕羽迷短歌  
雖製素長吟當執珪寄語當窗婦非關惜馬蹄

贈別司馬幼之南聘

故交忽千里輜車莅遠盟幽人重離別握手送征行晚  
霞浮極浦落景照長亭拂霧揚龍節乘風遡鳥旌楚山

百里映吳江萬仞清夏雲樓閣起秋濤帷蓋生陸侯持  
寶劍終子繫長纓前修亦何遠君其勗令名

遊梁城

揚鑣歷汴浦迴扈入梁墟漢藩文雅地清塵暖有餘賓  
遊多任俠臺苑盛簪裾歎息徐公劍悲涼鄒子書亭臯  
落照盡原野返寒初鳥散空城夕煙銷古樹疎東越嚴  
子陵西蜀馬相如修名竊所慕長謠獨課虛

春夕經行留侯墓

少小期黃石晚年遊赤松應成羽人去何忽掩高封疎  
蕪枕絕野邈迤帶斜峰墳荒隧草沒碑碎石苔濃狙秦  
懷猛氣師漢挺柔容盛烈芳千祀深泉閉九重夕風吟  
宰樹遲光落下春遂令懷古客揮淚獨無從

上已禊飲

山泉好風日城市厭囂塵聊持一樽酒共尋千里春餘  
光下幽桂夕吹舞青蘋何言出關後重有入林人

賦得珠簾

鑑帷明欲斂照檻色將晨可憐疎復密隱映當窗人浮  
清帶遠吹含光動細塵落花時屢拂會待玉階春

彭城王挽歌

旭旦禁門開隱隱靈輿發纔看鳳樓迴稍視龍山沒猶  
陳五營騎尚聚三河卒容衛儼未歸空山照秋月

後園宴

常聞崑閬有神仙雲冠羽佩得長年秋夕風動三珠樹  
春朝濕露九芝田不如鄴城佳麗所玉樓銀閣與天連

太液回波千丈映上林花樹百枝然流風續落渚行雲  
在南楚可憐白水神可念青樓女便妍不羞遊妖艷工  
言語池苑正芳菲得戲不知歸媚眼臨歌扇嬌香出舞  
衣纖腰如欲斷側髻似能飛南樓日已暮長簷烏應度  
竹殿遙聞鳳管聲虹橋別有羊車路攜手傍花叢徐步  
入房櫳欲眠衣先解半醉臉逾紅日日相看轉難厭千  
嬌萬態不知窮欲知妾心無劇已明月流光滿帳中

聽鳴蟬篇

聽鳴蟬此聽悲無極羣嘶玉樹裏迴噪金門側長風送  
晚聲清露共朝食晚風朝露實多宜秋日高鳴獨見知  
輕身蔽數葉哀鳴抱一枝流亂罷還續酸傷合更離暫  
聽別人心即斷纔聞客子淚先垂故鄉已超忽空庭正  
蕪沒一夕復一朝坐見涼秋月河流帶地從來嶮峭路  
干天不可越紅塵早敝陸生衣明鏡空悲潘掾髮長安  
城裏帝王州鳴鐘列鼎自相求西望漸臺臨太液東瞻  
甲觀距龍樓說客恒持小冠出越使常懷寶劍遊學仙

未成便尚主尋源不見已封侯富貴功名本多豫繁華  
輕薄盡無憂詎念嫫姚嗟木梗誰憶田單倦土牛歸去  
來青山下秋菊離離日堪把獨焚枯魚宴林野終成獨  
校子雲書何如還驅少游馬

薛道衡

字玄卿河東汾陰人

出塞二首

高秋白露團上將出長安塵沙塞外暗風月隴頭寒轉  
蓬隨馬足飛霜落劒端凝雲迷代郡流水凍桑乾烽微

桔槔遠橋峻輓轡難從軍多惡少召幕盡材官伏堤時  
卧鼓疑兵乍解鞍柳城擒冒頓長坂納呼韓受降今更  
築燕然已重刊還嗤傅介子辛苦刺樓蘭

邊庭烽火驚插羽夜徵兵少昊騰金氣文昌動將星步  
驅鞬汗北直指夫人城絕漠三秋暮窮陰萬里生寒夜  
哀笛曲霜天斷雁聲連旗下鹿塞疊鼓向龍庭妖雲墮  
虜陣暈月遶胡營左賢皆頓顙單于已繫纓綬馬登玄  
闕鉤鯤臨北溟當知霍驃騎高第起西京



昭君怨

我本良家子充選入椒庭不蒙女史進更失畫師情蛾  
眉非本質蟬鬢改真形專由妾命薄誤使君恩輕啼霑  
渭橋路歎別長安城夜依寒草宿朝逐轉蓬征卻望關  
山迥前瞻沙漠平胡風帶秋月嘶馬雜笳聲毛裘易羅  
綺氈帳代金屏自知蓮臉歇羞看菱鏡明釵落終應棄  
髻解不須縈何用單于重詎假閼氏名駃騠聊彊食筒  
酒未能傾心隨故鄉斷愁逐塞雲生漢宮如有憶為視

旄頭星

昔昔鹽

垂柳覆金堤，  
薜蘿葉復齊。  
水溢芙蓉沼，  
花飛桃李蹊。  
採桑秦氏女，  
織錦竇家妻。  
關山別蕩子，  
風月守空閨。  
恒斂千金笑，  
長垂雙玉啼。  
盤龍隨鏡隱，  
彩鳳逐帷低。  
飛魂同夜鵲，  
倦寢憶晨雞。  
暗牖懸珠網，  
空梁落燕泥。  
前年過代北，  
今歲往遼西。  
一去無消息，  
那能惜馬蹄。

豫章行

江南地遠接閩甌山東英妙屢經遊  
前瞻疊嶂千重阻却帶驚湍萬里流  
楓葉朝飛向京洛文魚夜過歷吳洲  
君行速度茱萸嶺妾住長依明月樓  
樓中愁思不開頻始復臨窗望早春  
鴛鴦水上萍初合鳴鶴園中花併新  
空憶常時角枕處無復前日畫眉人  
照骨金環誰用許見瞻明鏡自生塵  
蕩子從來好留滯况復關山遠迢遞  
當學織女嫁牽牛莫作姮娥叛夫婿  
偏訝思君無限極欲罷欲忘還復憶  
願作王母三青鳥飛去飛來傳消息

豐城雙劍昔曾離  
經年累月復相隨  
不畏將軍成久別  
只恐封侯心更移

奉和月夜聽軍樂應詔

旌門臨古堞  
徼道度深隍  
月冷疑秋夜  
山寒落夏霜  
遙空澄暮色  
清景散餘光  
笳聲喧隴水  
鼓曲噪漁陽  
沈鬱興神思  
眺聽發天章  
嵩岱終難學  
丘陵徒自強

秋日遊昆明池

灞陵因靜退  
靈沼暫徘徊  
新船木蘭楫  
舊宇豫章材  
荷

心宜露泣竹徑重風來魚潛疑刻石沙暗似沈灰琴逢  
鶴欲舞酒遇菊花開羈心與秋興陶然寄一杯

敬酬楊僕射山齋獨坐

相望山河近相思朝夕勞龍門竹箭急華岳蓮花高高  
岳嶂重疊鳥道風煙接遙原樹若薺遠水舟如葉葉舟  
旦旦浮驚波夜夜流露寒洲渚白月冷函關秋秋夜清  
風發彈琴即鑑月雖非莊舄歌吟詠常思越

入彬江

仗節遵嚴會揚舲沂急流征途非白馬水勢類黃牛跳  
波鳴石磧濺沫擁沙洲岸迴槎倒轉灘長船却浮綠崖  
頻斷挽挂壁屢移鈎還憶青絲騎東方來上頭

渡北河

連旌映淑浦疊鼓拂沙洲桃花長新浪竹箭下奔流塞  
雲臨遠艦胡風入陣樓劒拔蛟將出驂驚黿欲浮雁書  
終立效燕相果封侯勿恨關河遠且寬邊地愁

展敬上鳳林寺

淨土連幽谷寶塔對危峯林棲丹穴鳳地通白沙龍獨  
巖樓迥出複道閣相重洞開朝霧斂石濕曉雲濃高篠  
低雲蓋風枝響和鐘簷陰翻細柳澗影落長松珠桂浮  
明月蓮座吐芙蓉隱淪徒有意心迹未相從

人日思歸

入春纔七日離家已二年人歸落雁後思發在花前

夏晚

流火稍西傾夕影遍曾城高天澄遠色秋氣入蟬聲

魏澹

字彥深鉅鹿  
下曲陽人

初夏應詔

雖度芳春節物色尚餘華  
出簾飛小燕映戶落殘花  
舞衫飄細縠歌扇掩輕紗  
蘭房本宜夜不畏日光斜

辛德源

字孝基隴  
西狄道人

短歌行

馳射罷金溝戲笑上雲樓  
少妻鳴趙瑟侍妓轉吳謳  
杯度浮香滿扇舉細塵浮  
星河耿涼夜飛月艷新秋  
忽念



奔駒促彌欣執燭遊

白馬篇

任俠重芳辰相從競逐春  
金羈絡赭汗紫縷應紅塵  
寶劍提三尺雕弓韜六鈞  
鳴珂蹕細柳飛蓋出宜春  
遙見浮光發懸知上頭人

東飛伯勞歌

合歡芳樹連理枝荆王神女乍相隨  
誰家妖艷蕩輕舟  
含嬌轉盼騁風流  
犀棹蘭橈翠羽蓋  
雲羅霧縠蓮花帶

女兒年幾十六七玉面新妝映朝日落花從風俄度春  
空留可憐何處新

柳翬

字顧言  
襄陽人

奉和晚日楊子江應制

詰旦金鏡發驂駕出城闌鮮雲臨寶蓋細草藉班輪千  
里煙霞色四望江山春梅風吹落葉酒雨減輕塵日斜  
歡未畢睿想良非一風生疊浪起霧卷孤帆出揆藻麗  
繁星高論光朝日空美鄒枚侶終謝淵雲筆

奉和晚日楊子江應教

大江都會所長洲有舊名西流控岷蜀東泛邇蓬瀛未  
覩纖羅動先聽遠濤聲空濛雲色晦浹疊浪華生欲知  
暮雨歇當觀飛旆輕

陽春歌

春鳥一轉有千聲春花一叢千種名旅人無語坐簷楹  
思鄉懷土志難平惟當文共酒暫與興相迎

虞世基

字茂世會稽餘姚人

出塞二首

窮秋塞草腓塞外胡塵飛徵兵廣武至候騎陰山歸廟  
堂千里策將軍百戰威轅門臨玉帳大旆指金微摧朽  
無勅敵應變有先機銜枚壓曉陣卷甲解朝圍瀚海波  
瀾靜王庭氛霧晞鼓輦嚴朔氣原野曠寒暉勲庸震邊  
服歌吹入京畿待拜長平坂鳴騶入禮闈

上將三畧遠元戎九命尊緬懷古人節思酬明主恩山  
西多勇氣塞北有遊魂揚桴度隴坂勒騎上平原誓將

絕沙漠悠然去玉門輕齎不遑舍驚策驚戎輶慄慄邊  
風急蕭蕭征馬煩雪暗天山外冰塞交河源霧峰黯無  
色霜旗凍不翻耿介倚長劒日落風塵昏

奉和幸江都應詔

巡遊光帝典征吉乃先天澤國翔宸駕水府泛樓船七  
萃榮長薄三翼亘通川夙興大昕始求衣昧旦前澄瀾  
浮曉色遙林卷宿煙晨霞稍含景落月漸虧弦迴塘響  
歌吹極浦望旌旗方陪覲東后登封禪肅然

在南接北使

會玉二嶠至瑞節三秦歸林蟬疎欲盡江雁斷還飛  
垣崇客館旌蓋入王畿共此敦封植方欣薦紆衣

零落桐

零落三秋幹摧殘百尺柯空餘半心在生意漸無多

晚飛鳥

向日晚飛低飛飛未得棲當為歸林遠恒長侵夜啼

虞茂

按隋史無虞茂虞世基字茂世此或世基詩也觀諸集多以二名互載

賦昆明池一物得織女石

隔河圖列宿清漢象昭回  
支機就鯨石拂鏡取池灰  
船疑海槎渡珠似客星來  
所恨雙蛾斂逢秋遂不開

賦得石

蜀門鬱遐阻燕碣遠參差  
獨標千丈峻共起百重危  
鏡峯含月魄蓋嶺逼雲枝  
徒然抱貞介填海共誰知

江都夏

長洲茂苑朝夕除映日含風結  
細漪坐當伏檻紅蓮披

雕軒洞戶青蘋吹輕幌芳煙鬱金馥綺簷花簾桃李枝  
蘭苕翡翠但相逐桂樹駕鵞恒竝宿

長安道

露寒臺前曉露清昆明池水秋色明搖環動珮出層城  
鵝弦鳳管奏新聲上林蒲桃合縹緲甘泉奇樹上葱青  
玉人當歌理清曲娉好恩情斷還續

孫萬壽

字仙期信  
都武強人

遠戍江南寄京邑親友



賈誼長沙國屈平湘水濱江南瘴癘地從來多逐臣  
粵余非巧宦少小拙謀身欲飛無假翼思鳴不值晨  
如何載筆士翻作負戈人飄飄如木偶棄置同芻狗  
失路乃西浮非狂亦東走晚歲出函關方春度京口  
石城臨虎據天津望牛斗牛斗盛妖氛梟獍已成羣  
却超初入幕王粲始從軍裹糧楚山際披甲吳江濱  
吳江一浩蕩楚山何糾紛驚波上濺日喬木下臨雲  
繫越恒資辯喻蜀幾飛文魯連惟救患吾彥不爭勲  
羈遊歲月久歸思常

搔首非關不樹萱豈為無杯酒數載辭鄉縣三秋別親  
友壯志後風雲衰鬢先蒲柳心緒亂如絲空懷疇昔時  
昔時遊帝里弱歲逢知己旅食南館中飛蓋西園裏河  
間本好書東平惟愛士英辯接天人清言洞名理鳳池  
時寓直麟閣常遊止勝地盛賓僚麗景相攜招舟泛昆  
明水騎指渭津橋袂除臨灞岸供帳出東郊宜城醞始  
熟陽翟曲新調繞樹烏啼夜雖麥雉飛朝細塵梁下落  
長袖掌中嬌懽娛三樂至懷抱百憂銷夢想猶如昨尋

思久寂寥一朝牽世網萬里逐波潮迴輪常自轉懸旆  
不堪搖登高視衿帶鄉關白雲外迴首望孤城愁人益  
不平華亭宵鶴唳幽谷早鶯鳴斷絕心難續惆恍魂屢  
驚羣紀通家好鄒魯故鄉情若值南飛雁時能訪死生

別贈

昔我遊雲閣及爾謬同官高步參師友長裾接綺紉索  
居方十載相思勞萬端不言今夕遇得盡故人歡酒隨  
彭澤至琴即武城彈高齋屏餘熱珍簟宿經寒葉落霜

威重莫踈月色殘將歸動離恨彌傷行路難

行經舊國

蕭條金闕遠悵望羈心愁舊邸成三逕故園餘一丘庭  
引田家客池泛野人舟日斜山氣冷風近樹聲秋弱年  
陪宴喜方茲更獻酬修竹慚詞賦叢桂且淹留自忝無  
員職空貽不調羞武騎非吾好還思江漢遊

早發揚州還望鄉邑

鄉關不再見悵望窮此晨山煙蔽鍾阜水霧隱江津洲

渚斂寒色杜若變芳春無復歸飛羽空悲沙塞塵

東歸在路率爾成詠

學宦兩無成歸心自不平故鄉尚千里山秋猿夜鳴人  
愁慘雲色客意慣風聲羈恨雖多緒俱是一傷情

王春

字元恭琅  
邪臨沂人

七夕二首

天河橫欲曉鳳駕儼應飛落月移妝鏡浮雲動別衣懽  
逐今宵盡愁隨還路歸猶將宿昔淚更上去年機

終年恒弄杼今日始停梭卻鏡看斜月移居渡淺河長  
裙動星珮輕帳揜雲羅舊愁雖暫止新恨復還多

王胄

字承基  
齊之弟

別周記室

五里徘徊鶴三聲斷絕猿何言俱失路相對泣離樽別  
意悽無已當歌寂不喧貧交欲有贈掩涕竟無言

賦得雁送周員外戍嶺表

旅雁別衡陽天寒關路長行斷由驚箭聲嘶為犯霜惟

繳無人憫能鳴反自傷何如侶汎汎刷羽戲方塘

為寒牀婦贈夫

月靜閨偏冷更深夜轉長霜紈猶掩扇露縠未飄香解帶慙連理引被愧鴛鴦誰能未相識還為守空牀

元行恭

秋遊昆明池

旅客傷羈遠樽酒慰登臨池鯨隱舊石岸菊聚新金陣低雲色近行高雁影深欹荷瀉圓露卧柳橫清陰衣共

秋風冷心學古灰沈還似無人處幽蘭入雅琴

過故宅

頽城百戰後荒宅四鄰通將軍樹已折步兵途轉窮吹  
臺有山鳥歌庭聒野蟲草深斜徑沒水盡曲池空林中  
滿明月是處來春風惟餘一廢井尚夾兩株桐

尹式

河間人

別宋常侍

遊人杜陵北送客漢川東無論去與住俱是一飄蓬秋



鬢含霜白衰顏依酒紅別有相思處啼鳥雜夜風

劉斌

南陽人

送劉員外同賦陳思王詩得好鳥鳴高枝

春林已自好時鳥復和鳴枝交難奮翼谷靜易流聲間  
關纔得性繒繳遽相驚安知背飛遠拂霧獨晨征

詠山

靈山峙千仞蔽日且差峩紫蓋雲陰遠香爐煙氣多石  
梁高鳥路瀑水近天河欲知聞道里別自有仙歌

孔德紹會稽人

南隱遊泉山

名山狎招隱俗外遠相求  
還如倒景望忽似閨風遊  
臨崖俯大壑披霧仰飛流  
歲積松方偃年深椿欲秋  
野花開石鏡雲葉掩山樓  
何須問方士此處即瀛洲

行經太華

紛吾世網暇靈岳展幽尋  
寥廓風塵遠杳冥川谷深  
山昏五里霧日落二華陰  
疎峯起蓮葉危塞隱桃林  
何必

東都外此處可抽簪

夜宿荒村

綿綿夕漏深客恨轉傷心  
撫絃無人聽對酒時獨斟  
故鄉萬里絕窮愁百慮侵  
秋草思邊馬遶枝驚夜禽  
風度谷餘響月斜山半陰  
勞歌欲叙意終是白頭吟

送舍利宿定晉巖

仁祠表虛曠祇園展肅恭  
棲息翠微嶺登頓白雲峯  
映流看夜月臨風聽曉鐘  
澗芳十步草崖陰百丈松  
蕭然

遙路絕無復市朝蹤

孔紹安

傷顧學士

迢遞雙嶠道超忽三川湄此中俱失路思君不可思  
遊人行變橘逝者遽焚芝憶昔江湖上同詠子衿詩  
何言陵谷徙翻驚鄰笛悲陳根非席卉總帳異書帷  
與義成空說殲良信在茲今日嚴夫子哀命不衰時

別徐永元秀才

金湯既失險玉石乃同焚墜葉還相覆落羽更為羣豈  
謂三秋節重傷千里分促離絃易轉幽咽水難聞欲識  
相思處山川間白雲

應詔詠夫桃

結葉還臨影飛香欲徧空不意餘花落翻沈露井中

石榴

可惜庭中樹移根逐漢臣只為來時晚開花不及春

落葉

早秋驚落葉飄零似客心翻飛未肯下猶言惜故林

陳子良

吳人

春曉看羣公朝還人為八韻

遊子惜春暮策杖出蒿萊正值康莊晚羣公謁帝迴履  
度南宮至車從北闕來珂影傍明月笳聲動落梅迎風  
采眊轉照日綬花開紅塵掩鶴蓋翠柳拂龍媒綺雲臨  
舞閣丹霞薄吹臺輕肥寧所羨未若反山隈

入蜀秋夜宿江渚

我行逢日暮，弭棹獨維舟。  
水霧一邊起，風林兩岸秋。  
山陰黑斷磧，月影素寒流。  
故鄉千里外，何以慰羈愁。

賦得妓

金谷多歡宴，佳麗正芳菲。  
流霞席上滿，迴雪掌中飛。  
明月臨歌扇，行雲接舞衣。  
何必桃將李，別有待春暉。

送別

落葉聚還散，征禽去不歸。  
以我窮途泣，沾君出塞衣。

七夕看新婦隔巷停車

隔巷遙停幃非復為來遲只言更尚淺未是渡河時

袁朗

雍州長安人

秋日應詔

玉樹涼風舉金塘細柳萎葉落商飈觀鴻歸明月池迎  
寒桂酒熟含霧菊花垂一奉章臺宴千秋長願斯

秋夜獨坐

危弦斷客心虛彈落驚禽新秋百慮淨獨夜九愁深枯  
蓬惟逐吹墜葉不歸林如何悲此曲坐作白頭吟



杜公瞻

詠同心芙蓉

灼灼荷花瑞亭亭出水中一莖孤引綠雙影共分紅色  
奪歌人臉香亂舞衣風名蓮自可念况復兩心同

王衡

玩雪

寒庭浮暮雪疑從千里來皎潔隨處滿流亂逐風迴壁  
臺如始構瓊樹似新栽不待陽春節誰持競落梅

薛德音

薛牧弟牧與弟德音元敬齊名世號河東三鳳

悼亡

鳳樓簫曲斷桂帳瑟弦空  
畫梁纔照日銀燭已隨風  
苔生履跡處花沒鏡塵中  
惟餘長簞月永夜向朦朧

釋慧淨

俗姓房氏常山真定人

和琳法師初春法集之作

鷲嶺光前選祇園表昔恭哲人崇踵武弘道會羣龍高  
座登蓮葉塵尾振霜松塵飛揚雅梵風度引疎鐘靜言

澄義海叢論上詞鋒心虛道易合跡廣席難重和風動  
淑氣麗日啓時雍高才揆雅什顧已濫朋從因茲仰積  
善靈華斯可逢

和盧贊府遊紀國道場

日光通漢室星彩晦周朝法域從此構香閣本岩羗珠  
盤仰承露剎鳳俯摩霄落照侵虛牖長虹拖跨橋高才  
暫騁目雲藻遂飄飄欲追千里驥終是謝連鑣

於冬日普光寺卧疾值雪簡諸舊遊

卧疴苦留滯闢戶望遙天寒雲舒復卷落雪斷還連凝  
華照書閣飛素婉琴弦迴飄洛神賦皎映齊紈篇縈階  
如鶴舞拂樹似花鮮徒賞豐年瑞沈憂終自憐

釋智炫

遊三學山

秀嶺接重煙嶽岑上半天絕巖低更舉危峯斷復連側  
石傾斜澗回流瀉曲泉野紅知草凍春來鳥自傳樹錦  
無機織猿鳴詎假弦葉密風難度枝疎影易穿抱袞依

閒沼策杖戲荒田遊心清漢表置想白雲邊榮名非我  
願息意且蕭然

釋玄達

言離廣府還望桂林去留愴然自述贈懷

標心之梵宇運想入仙洲嬰痼乖同好沈情阻若抽葉  
落乍難聚情離不可收何日乘杯至詳觀演去流

無名釋

生忍頌

玄亮吐清氣神響徹幽壑登基發春詠高興希避蹤乘  
虛感靈覺魚山振思童摹寫天歌梵冀布法音同志高  
故不下颿颿數仞中比丘歌聲咀人畜振心鍾斯由暢  
玄句即感寫遊空神期發筌悟豁爾二靈通

順益頌

騷驥資鞭策蘭蕙佇薰風至理信難見非人孰可通輸  
心仰圓極瑩麗入玄中總轡超三有搏飛上四空簪纓  
猶幻夢財利若塵蒙高揖謝時俗瀟灑出樊籠

侯夫人

自傷

初入承明日深深報未央  
長門七八載無復見君王  
春寒入骨清獨卧愁空房  
颯履步庭下幽懷空感傷  
平日親愛惜自待却非常  
色美反成棄命薄何可量  
君恩實疎遠妾意徒彷徨

妝成

妝成多自惜夢好却成悲  
不及楊花意春來到處飛

自感二首

欲泣不成淚悲來翻強歌  
庭花方爛熳無計奈春何  
春陰正無際獨步意如何  
不及閒花草翻承雨露多

看梅二首

砌雪無消日捲簾時  
自顰庭梅對我有憐意  
先露枝頭一點春

香清寒艷好誰惜  
是天真玉梅謝後陽和至  
散與羣芳自在春



丁六娘

十索四首

裙裁孔雀羅紅綠相參對映以蛟龍錦分明奇可愛麤  
細君自知從郎索衣帶

為性愛風光偏憎良夜促曼眼腕中嬌相看無厭足懽  
情不耐眠從郎索花燭

君言花勝人人今去花近寄語落花風莫吹花落盡欲  
作勝花妝從郎索紅粉

二八好容顏非意得相關  
逢桑欲採折尋枝倒懶攀  
欲呈纖纖手從郎索指環

同前二首

含嬌不自轉送眼勞相望  
無那關情伴共入同心帳  
欲防人眼多從郎索錦障

蘭房下翠帳蓮帳舒鴛鴦  
錦懽情宜早暢密意須同寢  
欲共作纏綿從郎索花枕

張碧蘭

寄阮郎

卽如洛陽花  
妾似武昌柳  
兩地惜春風  
何時一攜手

送別詩

楊柳青青著地垂  
楊花漫漫攪天飛  
柳條折盡花飛盡  
借問行人歸不歸

陌上桑

日出秦樓明  
條垂露尚盈  
蠶饑心自急  
開奩妝不成

王昭君

猗蘭恩寵歇，昭陽幸御稀。  
朝辭漢闕去，夕見胡塵飛。  
寄言秦樓下，因書秋雁歸。

夜夜曲


愁人夜獨傷，滅燭卧蘭房。  
祗恐多情月，旋來照妾牀。

雞鳴歌

東方欲明星爛爛，汝南晨雞登壇喚。  
曲終漏盡嚴具陳，月沒星稀天下旦。  
千門萬戶遞魚鑰，宮中城上飛烏鵲。

黃門倡歌

佳人俱絕世握手上春樓  
點黛方初月縫裙學石榴  
君王入朝罷爭競理衣裳



石倉歷代詩選卷十一

欽定四庫全書

集部

石倉歷代詩選卷十三

詳校官庶吉士臣范逢恩

侍讀臣孫球覆勘

總校官進士臣朱鈐

校對官編修臣盧燧

謄錄監生臣顧維琳

欽定四庫全書

石倉歷代詩選卷十二

明 曹學佺 編

北魏詩

韓延之

字顯宗南陽堵陽人

贈中尉李彪

賈生謫長沙董儒詣臨江愧無若人跡忽尋兩賢蹤追昔渠閣游策駕厠羣龍如何情願奪飄然獨遠從痛哭



去舊國銜淚屈新邦  
哀哉無援民嗷然失侶  
鴻彼蒼不我聞  
十里告志同

劉昶

字休道宋文帝第九子

斷句

白雲滿郭來黃塵暗天起  
關山四面絕故鄉幾千里

蕭綜

字世謙梁武帝第二子封豫章王  
大同四年為都督南兗州刺史鎮彭城  
奔魏歷司徒太

尉尚壽陽公主在魏不得志嘗  
作聽鐘鳴悲落葉以申其志

聽鐘鳴

歷歷聽鐘鳴當知在帝城西樹隱落月東窗見曉星霧  
露肫肫未分明烏啼啞啞已流聲驚客思動客情客思  
鬱縱橫翩翩孤雁何所栖依依別鶴半夜啼今歲行已  
暮雨雪向淒淒飛蓬旦夕起楊柳尚翻低氣鬱結涕滂  
沱愁思無所託彊作聽鐘歌

悲落葉

悲落葉聯翩下重疊重疊落且飛從橫去不歸長枝交  
蔭昔何密黃鳥關關動相失夕榮雜凝露朝花翻亂日

亂春日起春風春風春日此時同一霜兩霜猶可當五  
晨六旦已颯黃乍逐驚風舉高下任飄颺悲落葉落葉  
何時還夙昔共根本無復一相關各隨灰土去高枝難  
重攀

高允

字伯恭渤海  
人

羅敷行

邑中有好女姓秦字羅敷巧笑美回盼鬢髮復凝膚脚  
著花文履耳穿明月珠頭作墜馬髻倒枕象牙梳姍姍

善趨步檐檐曳長裾王侯為之顧駟馬自踟躕

王子喬

王少卿王少卿超升飛龍翔天庭遺儀景雲漢酬光鶩  
電逝忽若浮騎日月從列星跨騰八廓踰杳冥尋元氣  
出天門窮覽有無究道根

常景

字永昌河  
內溫人

讚四君

長卿有艷才直致不羣性鬱若春煙舉皎如秋月映遊

梁雖好仁仕漢常稱病清貞非我事窮達委天命

右司馬相如

王子挺秀質逸氣干青雲明珠既絕俗白鵠信驚羣才  
世苟不合遇否途自分空枉碧鷄命徒獻金馬文

右王褒

嚴君情沈靜立志明霜雪味道綜微言端著演妙說才  
屈羅仲口位結李強舌素尚邁金貞清標陵玉徹

右嚴君平

蜀江導清流揚子挹餘休含光絕後彥覃恩邈前脩世  
輕久不賞玄談物無求當途謝權寵置酒得閒遊

右揚雄

李騫

字希義趙郡平棘人

贈親友

幽棲多暇日總駕萃荒坳南瞻帶宮雉北睇拒畦瀛流  
火時將未懸炭漸云輕寒風率已厲秋水寂無聲層陰  
蔽長野凍雨暗窮汀侶浴浮還沒孤飛息且驚三褫俄

終歲一九曾未營閒居同洛溪歸身歎武城稍旅原思  
翟坐夢尹勤荆監河愛斗水蘇子借餘明益州達友趣  
廷尉辯交情豈若忻蓬華收志偶沈冥

溫子昇

字鵬舉其先太原人  
祖避難家于濟陰

擣衣

長安城中秋夜長佳人錦石擣流黃香杵紋砧知近遠  
傳聲遞響何淒涼七夕長河爛中秋明月光蠨螋塞邊  
絕侯雁鴛鴦樓上望天狼

從駕幸金墉城

茲城實佳麗飛甍自相竝  
膠葛擁行風嵒堯閱流景御  
溝屬清洛馳道通丹屏湛淡水成文參差樹交影長門  
久已閉離宮一何靜細草綠玉階高枝蔭桐井微微夕  
渚暗肅肅暮風冷神行揚翠旗天臨肅清警伊臣從下  
列逢恩信多幸康衢雖已泰弱力將安騁

春日臨池

光風動春樹丹霞起暮陰  
差峩映連壁飄飄下散金徒



自臨濠渚空復撫鳴琴莫知流水曲誰辯遊魚心

詠花蝶

素蝶向林飛紅花逐風散花蝶俱不息紅素還相亂  
芬芳共襲手葳蕤從可玩不慰行客心遽動離居歎

王容

大堤女

寶髻耀明璫香羅鳴玉珮大堤諸女兒一一皆春態  
入花花不見穿柳柳陰碎東風拂面來由來亦相愛

楊白花

陽春二三月楊柳齊作花  
春風一夜入閨闥楊花飄蕩  
落南家含情出戶脚無力  
拾得楊花淚沾臆秋去春還  
雙燕子願銜楊花入窠裏

咸陽王歌

可憐咸陽王奈何作事誤  
金牀玉机不能眠夜踏霜與  
露洛水湛湛彌岬長行人  
那得渡

北齊詩

邢邵

字子才河間鄭人

三日華林園公宴

迴鑾自樂野弭蓋屬瑤池五承接光景七友樹風儀芳  
春時欲遽覽物惜將移新萍已冒沼餘花尚滿枝草滋  
徑蕪沒林長山蔽虧芳筵羅玉俎激水漾金卮歌聲斷  
以續舞袖合還離

冬日傷志詩

昔時情遊士任性少矜裁朝驅瑪瑙勒夕銜熊耳杯折

花步淇水撫瑟望叢臺繁華夙昔改衰病一時來重以  
三冬月愁雲聚復開天高日色淺林勁鳥聲哀終風激  
簷宇餘雪滿條枚遨遊昔宛洛踟躕今草萊時事方去  
矣撫已獨傷懷

七夕

盈盈河水側朝朝長歎息不恡漸衰苦波流詎可測秋  
期忽云至停梭理容色束衿未解帶迴鑾已沾軾不見  
眼中人誰堪機上織願逐青鳥去慙因希羽翼

齊韋道遜晚春宴

日斜賓館晚風輕  
麥候初簷喧巢幕燕  
池躍戲蓮魚石聲  
隨流響桐影傍巖疎  
誰能千里外獨寄八行書

魏收

字伯起鉅鹿  
下曲陽人

喜雨

霞暉染刻棟礎潤上雕楹  
神山千葉照仙草百花榮  
瀉溜高齋響漆池曲岸平  
滴下如珠落波迴類壁成  
氣調登萬里年和欣百靈  
定知丹甑出何須銅雀鳴

看柳上鵲

背歲心能識登春巢自成立枯隨雨霽依枝須月明疑  
是雕籠出當由抵玉鶯間關拂條軟迴復振毛輕何獨  
離婁意傍人但未聽

五日

麥涼殊未畢蜩鳴早欲聞喧林尚黃鳥浮天已白雲辟  
兵書鬼字神印題靈文因想蒼梧郡茲日祀東君

庭栢

古松圖偃蓋新柏寫爐峯凌寒翠不奪迎暄綠更濃茹  
葉輕沈體咀實化衰容將使中臺麝違山能見從

祖珽

字孝徵  
瑩之子

從北征

翠旗臨塞道靈鼓出桑乾祁山斂霧霧瀚海息波瀾戍  
亭秋雨急關門朔氣寒方繫單于頸歌舞入長安

望海

登高臨巨壑不知千萬里雲島相接連風潮無極已時

看遠鴻度乍見驚鷗起無待送將歸自然傷客子

蕭慤

字仁祖  
蘭陵人

臨高望

崇臺高百尺迥出望仙宮畫拱浮朝氣飛梁照晚虹小  
衫飄霧縠艷粉拂輕紅笙吹汶陽篠琴奏嶧山桐舞逐  
飛龍引花隨少女風臨春今若此極宴豈無窮

上之回

發軔城西時回輿事北遊山寒石道凍葉下故宮秋朔



路傳清警邊風捲畫旒歲餘巡省畢擁仗返皇州

和崔侍中從駕經山寺

鈞陳夜警徼河漢曉參橫游騎騰文馬前驅轉翠旌野  
禽喧曙色山樹動秋聲雲表金輪見巖端畫拱明塔疑  
從地涌蓋似積香成泉高下溜急松古上枝平儀台多  
北思麗藻蔚緣情自嗤非照無何以繼連城

屏風

秦皇臨碣石漢帝幸明庭非關重遊豫直是愛長齡讀

紀知州所觀圖見岳形曉識仙人氣  
夜辨少微星服銀  
有秘術蒸丹傳舊經  
風搖百影樹花落萬春  
亭飛流近  
更白叢竹遠彌青  
逍遙保清暢因持悅性情

奉和初秋西園應教

池亭三伏後林館九秋前  
清泠間泉石散漫雜風煙  
藻  
開千葉影榴艷百枝然  
約嶺停飛旆凌波動畫船

奉和冬至應教

天宮初動磬緹室已飛灰  
暮風吹竹起陽雲覆石來  
折

冰開荔色除雪出蘭栽慙無宋玉辯濫吹楚王臺

春庭晚望

春遶聊縱望樓臺自相隱窗梅落晚花池竹開初笋泉  
鳴有水急雲來覺山近不愁花不飛到畏花飛盡

秋思

清波收潦日華林鳴籟初芙蓉露下落楊柳月中疎燕  
幃綃綺被趙帶流黃裾相思阻音息結夢感離居

聽琴

洞門涼氣滿閒館夕陰生弦隨流水急調雜秋風清掩  
抑朝飛弄淒斷夜啼聲至人齊物我持此悅高情

春日曲水

落花無限數飛鳥排花度禁苑至饒風吹花春滿路巖  
前片石迴如樓水裏連沙聚作洲二月鶯聲纔欲斷三  
月春風已復流分流遶小渡塹水還相注山頭望水雲  
水底看山樹舞餘香尚存歌盡聲猶住麥隴一鷺暈菱  
潭兩飛鷺飛鷺復鷺暈傾曦帶掩扉芳飈翼還憶藻露

挹行衣

顏之推

字介珣  
琅琊臨沂人

古意二首

十五好詩書二十彈冠仕  
楚王賜顏色出入章華裏  
作賦凌屈原讀書誇左史  
數從明月讌或侍朝雲祀  
登山摘紫芝泛江采綠芷  
歌舞未終曲風塵暗天起  
吳師破九龍秦兵割千里  
狐兔穴宗廟霜露沾朝市  
壁入邯鄲宮劒去襄城水  
未獲殉陵墓獨生良足恥  
憫憫思舊都

惻惻懷君子白髮窺明鏡憂傷沒余齒

寶珠出東國美玉產南荆隋侯曜我色卞氏飛吾聲已  
加明稱物復飾夜光名驪龍旦夕駭白虹朝暮生華彩  
燭兼乘價值詎連城常悲黃雀起復畏靈蛟迎千办安  
可捨一毀難復營昔為時所重今為時所輕願與濁泥  
會思將垢石并歸真川岳下抱潤潛其榮

從周入齊夜度砥柱

俠客重艱辛夜出小平津馬色迷關吏雞鳴起戍人露

鮮華劍彩月照寶刀新問我將何去北海就孫賓

和楊納言聽鳴蟬篇

聽秋蟬秋蟬非一處細柳高飛夕長楊明月曙歷亂起  
秋聲參差攬人慮單吟如轉簫羣噪學調笙風飄流曼  
響多含斷絕聲垂陰自有樂飲露獨為清短綏何足貴  
薄羽不差輕蟬螳翳下偏難見翡翠竿頭絕易驚容止  
由來桂林苑無事淹留南斗城

雜歌謠辭

無名氏

敕勒歌

敕勒川陰山下天似穹廬籠蓋四野天蒼蒼野茫茫風  
吹草低見牛羊

北周

明帝

姓宇文氏諱  
毓文帝長子

賁韋居士

六爻貞遯世三辰光少微潁陽去猶遠滄洲遂不歸風  
動秋蘭佩香飄蓮葉衣坐石窺仙洞乘槎下釣磯嶺松



千仞直巖泉百丈飛  
聊登平樂觀遙想首陽薇  
儻能同四隱余方叩萬機

過舊宮

玉燭調秋氣金輿歷舊宮  
還如過白水更似入新豐  
秋潭清晚菊寒井落疎桐  
舉杯延故老今聞歌大風

滕王迺

字固突文帝第十三子

至渭源

渭源奔禹穴輕瀾起客亭  
淺淺瀾澗響蕩蕩竟川鳴  
潘

生稱運石馮子聽波聲斜去臨天半橫來對始平合流  
應不雜方知性本清

蕭撝

字智選梁安成王秀之子

孀婦吟

寒夜靜房櫳孤妾思偏叢悲生聚紺黛淚下浸妝紅蓄  
恨縈心裏含啼歸帳中會須明月落那忍見牀空

日出行

昏昏隱遠霧團團乘陣雲正值秦樓女含嬌酬使君

和梁武陵王遙望道館

神境流精闕仙居紫翠房今有尋真地迤邐麗通莊九  
柱含虬重三臺飾夜光金輝碧海軸玉笈紫書方拂筵  
青鳥集吹簫白鳳翔履歸堪是驚石在詎非羊煙霞四  
照藥風月五名香於茲喜臨眺願得假霓裳

上蓮山

獨邁青蓮嶺超奇紫蓋峯挂流遙似鶴插石近如龍沙  
崩聞韻鼓霜落候鳴鐘飛花滿叢桂輕吹起脩筇石蒲

今尚有採摘更相逢

宗懔

字元懔南陽涅陽人

和歲首寒望

旅騎出平原  
鉦鐃遍野喧  
接里開都邑  
連車駐小門  
稻車迴故塢  
獵馬轉新村  
古碑空戴石  
山龕未上幡  
所言春不至  
未有桃花源

早春

昨暝春風起  
今朝春氣來  
鶯鳴一兩轉  
花樹數重開  
散

粉成初蝶剪綵作新梅遊客傷千里無暇上高臺

春望

日暮春臺望徙倚愛餘光都尉新移棗司空始種楊一枝猶桂馥十步有蘭香望望無萱草忘憂竟不忘

王褒

字子深瑯邪臨沂人

從軍行

兵書久閒習征戰數曾經講戎平樂觀學戲羽林亭西征度疎勒東驅出井陘牧馬濱長渭營軍毒上涇平雲

如陣色半月類城形羽書封信璽詔使動流星對岸流  
沙白綠河柳色青將幕恒臨斗旌門常背邢勲封瀚海  
石功勒燕然銘兵勢因麾下軍圖送掖庭誰憐雙玉筋  
向暮掩金屏

長安有狹邪行

威紆狹邪道車騎動相喧博徒稱劇孟游俠號王孫勢  
傾魏侯府交盡翟公門路邪勞夾轂塗艱倦折轅日斜  
宣曲觀春還御宿園塗歌楊柳曲巷飲榴花樽獨有遊

梁倦還守孝文園

凌雲臺

高臺懸百尺中夕殊未窮北臨酸棗寺西眺明光宮城  
傍抵雙府林裏對相風書題鹿盧榜觀寫飛廉銅窗開  
神女電梁映美人虹虞捐濫天寵鄭督特懷忠莊生垂  
翠釣昭儀拒鬪熊馳輪有盈缺人道亦汗隆還念西陵  
舞非復鄴城中

出塞

飛蓬似征客千里自長驅塞禽惟有雁關樹但生榆背  
山看故壘繫馬識餘蒲還因麾下騎來送月支圖

關山月

關山夜月明秋色照孤城影虧同漢陣輪滿逐胡兵天  
寒光轉白風多暈欲生寄言亭上吏遊客解難鳴

長安道

槐衢回北第馳道度西宮樹陰連袖色塵影雜衣風採  
桑逢五馬停車對兩童喧喧許史座鐘鳴賓未窮



古曲

青樓臨大道游俠盡淹留陳王金被馬秦女桂為鈎馳  
輪洛城巷鬪雞南陌頭薄暮風塵起聊為清夜遊

燕歌行

初春景麗鶯欲嬌桃花流水沒河橋薔薇花開百重葉  
楊柳拂地數千條隴西將軍號都護樓蘭校尉稱嫖姚  
自從昔別春燕分經年一去不相聞無復漢地關山月  
惟有漠北薊城雲淮南桂中明月影流黃機上織成文

充國行軍屢築營陽史討虜陷平城城下風多能却陣  
沙中雪淺詎停兵屬國小婦猶年少羽林輕騎數征行  
遙聞陌頭采桑曲猶勝邊地胡笳聲胡笳向暮使人泣  
長望閨中空佇立桃花落地杏花舒桐生井底寒葉疎  
試為來看上林雁應有遙寄隴頭書

九日從駕

黃山獵地廣青門官路長律改三秋節氣應九鍾霜曙  
影初分地暗色始成光高旆長楸坂緹幕杏間堂射馬

垂雙帶豐貂佩兩璜苑寒梨樹紫山秋菊葉黃華露霏  
霏冷輕颼颼凉終慙屬車對空假侍中郎

贈周處士

我行無歲月征馬屢盤桓峭曲三危岨關重九折難猶  
持漢使節尚服楚臣冠巢禽疑上幕驚羽畏虛彈飛蓬  
去不已客思漸無端壯志與時歇生年隨事闌百齡悲  
促命數刻念餘歡雲生隴坻黑桑疎薊北寒鳥道無蹊  
徑清漢有波瀾思君化羽翮要我鑄金丹

別陸子雲

解纜出南浦，征棹且凌晨。  
還看分手處，惟餘送別人。  
中流搖蓋影，邊江落騎塵。  
平湖開曙日，細柳發新春。  
滄波不可望，行雲聊共因。

奉和趙王途中五韻

飄飄映車幕，出沒望連旗。  
度雲還翊陣，迴風即送師。  
峽路沙如月，山峯石似眉。  
村桃拂紅粉，岸柳被青絲。  
錦城遙可望，迴鞍念此時。

玄圃濬池臨泛奉和

長洲春水滿臨泛廣川中石壁如明鏡飛橋類飲虹垂  
楊夾浦綠新桃綠徑紅對樓還泊岸迎波暫守風漁舟  
釣欲滿蓮房採半空於茲臨北闕非復坐牆東

和從弟祐山家二首

採藥名山頂時節無春冬散雲非一色連崑異衆峯合  
杳似無徑間關定有蹤山窗臨絕頂檐溜俯危松空林  
鳴暮雨虛谷應朝鐘仙童時可遇羽客屢相逢若值韓

衆藥當御長房龍

結交非俗士仙侶自招攜  
少華隱日月太乙尋虹霓  
衆林積為籟園竹茂成埤  
幽谷曙無景荒途晝欲迷  
滴瀝寒泉溜呌嘯秋猿啼  
白雲帝鄉起神禽丹穴棲  
箭篠時通徑桃李復成蹊  
今身得其所羣物可令齊

詠雁

伺潮聞曙響妬壘有春暈  
豈若雲中雁秋時塞外歸  
河長猶可涉海濶故難飛  
霜多聲轉急風疎行屢稀  
園池

若可至不復怯虞機

渡河北

秋風吹木葉還似洞庭波  
常山臨代郡亭障繞黃河  
心悲異方樂腸斷隴頭歌  
薄暮臨征馬失道北山阿

詠月贈人

月色當秋夜斜暉映薄帷  
上弦如半壁初魄似蛾眉  
渡雲光忽駛中天影更遲  
高陽懷許掾對此益相思

入關故人別

百年餘古樹千里闍黃塵關山行就近相看成遠人

過歲矜道館

松古無年月鵲去復來歸石壁藤為路山窗雲作扉

釋亡名

俗姓宋氏  
南郡人

五苦詩

生

可患身為患生將憂共生心神恒獨苦寵辱橫相驚朝  
光非久照夜燭幾時明終成一聚土強覓千年名



老

少日欣日益老至昔年侵紅顏既罷豔白髮寧久吟階  
庭惟仰杖朝府不勝簪甘肥與妖麗徒有壯時心

病

拔劍平四海橫戈却萬夫一朝牀枕上迴轉仰人扶壯  
色隨肌減呻吟與病俱綺羅雖滿目愁眉獨向隅

死

可惜凌雲氣忽隨朝露終長辭白日下獨入黃泉中池

臺既已沒墳隴向應空惟當松柏裏十年恒勁風

愛離

誰忍心中愛分為別後思幾時相握手嗚咽不能辭雖  
言萬里隔猶有望還期如何九泉下更無相見時

五盛陰

先去非長別後來非久親新墳將舊塚相次似魚鱗茂  
陵誰辨漢驪山詎識秦千年與昨日一種併成塵定知  
今世上還是昔時人焉能取他骨復持埋我身

庾信

字子山  
新野人

對酒歌

春水望桃花春洲藉芳杜琴從綠珠借醞就文君取牽  
馬向渭橋日曝山頭脯山簡接羅倒玉戎如意舞箏鳴  
金谷園笛韻平陽塢人生一百年歡笑惟三五何處覓  
錢刀求為洛陽賈

昭君辭應詔

斂眉光祿塞還望夫人城片片紅顏落雙雙淚眼生冰

河牽馬渡雪路抱鞍行胡風入骨冷夜月照心明方調  
琴上曲變入胡笳聲

出自薊北門行

薊門還北望役役盡傷情關山連漢月隴水向秦城笳  
寒蘆葉脆弓凍紵弦鳴梅林能止渴複姓可防兵將軍  
朝挑戰都護夜巡營燕山猶有石須勒幾人名

烏夜啼

桂樹懸知遠風竿詎肯低獨憐明月夜孤飛猶未棲虎

賁誰見惜御史詎相攜雖言入絃管終是曲中啼

又

促柱繁絃非子夜歌聲舞態異前溪御史府中何處宿  
洛陽城頭那得棲彈琴蜀郡卓家女織錦秦川竇氏妻  
詎不自驚長淚落到頭離烏恒夜啼

燕歌行

代北雲氣晝昏昏千里飛蓬無復根寒雁嗷嗷渡遼水  
桑葉紛紛落薊門晉陽山頭無竹箭疎勒城中乏水源

屬國征戎久離居陽關音信絕能疎願得魯連飛一箭  
特寄思歸燕將書渡遼本自有將軍寒風蕭蕭生水紋  
妾驚甘泉足烽火君訝漁陽少陣雲自從將軍出細柳  
蕩子空牀難獨守盤龍明鏡餉秦嘉辟惡生香寄韓壽  
春分燕來能幾日二月蠶眠不復久洛陽遊絲百丈連  
黃河春冰千片穿桃花顏色好如馬榆莢新開巧似錢  
蒲桃一杯千日醉無事九轉學神仙定取金丹作幾服  
能令華表得千年

楊柳歌

河邊楊柳百丈枝別有長條踈地垂河水衝激根株危  
倏忽河中風浪吹可憐巢裏鳳凰兒無故當年生別離  
流槎一去上天池織女支機當見隨誰言從來蔭數國  
直用東南一小枝昔日公子出南皮何處相尋玄武陂  
駿馬翩翩西北馳左右彎弧仰月支連錢障泥渡水騎  
白玉手板落盤螭君言丈夫無意氣試問燕山那得碑

遊山

聊登玄圃殿更上增城山不知高幾里低頭看世間唱  
歌雲欲聚彈琴鶴欲舞澗底百重花山根一片雨婉婉  
藤倒垂亭亭松直豎

和宇文京兆遊田

小苑禁門開長楊獵客來懸知畫眉罷走馬向章臺澗  
寒泉反縮山晴雲倒回熊飢自舐掌雁驚獨銜枚美酒  
餘杭醉芙蓉即奉杯

奉報窮秋寄隱士



王倪逢齧缺桀溺偶長沮藜床負日卧  
麥隴帶經鋤自然曲木几無名科斗書  
聚花聊飼雀穿池試養魚小村治澀路  
低田補壞渠秋水牽沙落寒藤抱樹疎  
空枉平原騎來過仲蔚廬

上益州上柱國趙王

銅梁影棠樹石鏡寫褰帷兩江如瀆錦  
雙峯似畫眉穿荷低晚蓋衰柳挂殘絲  
風流盛儒雅泉湧富文詞無因同子淑  
暫得侍臨淄

入彭城館

襄君前建國項氏昔稜威  
鵠飛傷楚戰雞鳴悲漢圍  
年代殊氓俗風雲更盛衰  
水流浮磬動山喧雙雉飛  
夏餘花欲盡秋近燕將稀  
槐庭垂綠穗蓮浦落紅衣  
徒知日云暮不見客行歸

奉報趙王出師在道賜詩

上將出東平先定下江兵  
彎弓伏石動振鼓沸沙鳴  
橫海將軍號長風駿馬名  
雨歇殘虹斷雲歸一雁征  
暗巖

朝石濕空山夜火明低橋澗底渡狹路花中行錦車同  
建節魚軒異泊營軍中女子氣塞外夫人城小人乖攝  
養岐路阻逢迎幾月芝田熟何年金竈成哀笳關塞曲  
嘶馬別離聲王子身為寶深思不倚衡

和趙王送陝中軍

樓船聊習戰白羽試撓軍山城對却月岸陣抵平雲赤  
虵懸弩影流星抱劒文胡笳遙警夜塞馬暗嘶羣客行  
明月峽猿聲不可聞

至老子廟應詔

虛無推馭辨寥廓本乘蜺三門臨苦縣九井對靈谿盛  
丹須竹節量藥用刀圭石似臨邛芋芝如封禪泥氈毛  
新鵠小盤根古樹低野戍孤煙起春山百鳥啼路有三  
千別途經七聖迷惟當別關吏直向流沙西

奉和同泰寺浮圖

岌岌凌太清照殿北東京長影臨雙闕高層出九城拱  
積行雲礙幡搖度鳥驚鳳飛如始泊蓮合似初生輪重

對月滿鐸韻擬鸞聲畫水流全住圖雲色半輕露晚盤  
猶滴珠朝火更明雖連博望苑還接銀沙城天香下桂  
殿仙梵入伊笙庶聞八解樂方遣六塵情

和從駕登雲居寺塔

重巖千仞塔危磴九層臺石關恒逆上山梁乍斗迴階  
下雲峯出窗前風洞開隔嶺鐘聲度中天梵響來平時  
欣侍從於此暫徘徊

奉和示內人

然香鬱金屋吹管鳳凰臺春朝迎雨去秋夜隔河來聽  
歌雲即斷聞琴鶴倒回春窗刻鳳下寒壁畫花開定取  
流霞氣時添承露杯

奉和趙王美人春日

直將劉碧玉來過陰麗華祇言滿屋裏併作一園花新  
藤亂上格春水漫吹沙步搖釵梁動紅輸被角斜今年  
迎春處先向石崇家

奉和趙王春日

城傍金谷苑園裏鳳凰池細管調歌曲長衫教舞兒向  
人長曼臉由來薄面皮梅花絕解作樹葉本能吹香煙  
龍口出蓮子帳心垂莫畏無春酒須花但見隨

和詠舞

洞房花燭明燕餘雙舞輕頓履隨疎節低鬟逐上聲步  
轉行初進衫飄曲未成鸞迴鏡欲滿鶴顧市應傾已曾  
天上學詎是世中生

預麟趾殿校書和劉儀同

止戈興禮樂脩文盛典謨壁開金石篆河浮雲霧圖  
香上延閣碑石向鴻都誦書徵博士明經拜大夫壁池  
寒水落學市舊槐疎高譚變白馬雄辯塞飛狐月落將  
軍樹風驚御史烏子雲猶汗簡溫舒正削蒲連雲雖有  
閣終欲想江湖

同會河陽公新造山池聊得寓目

橫階仍鑿澗對戶即連峯暗石疑藏虎盤根似卧龍沙  
洲聚亂荻洞口礙橫松引泉恒數派開巖即千重北閣



聞吹管南鄰聽擊鐘  
菊寒花正合杯香酒絕濃  
由來魏公子今日始相逢

登州中新閣

跨虛凌倒景連雲詎少陽  
璇極龍鱗上雕甍鵬翅張  
千尋文杏照十里木蘭香  
開窗對高掌平坐望河梁  
歌響聞長樂鐘聲徹建章  
賦用王延壽書須韋仲將  
龍來隨畫壁鳳起逐吹簫  
石作芙蓉影池如明鏡光  
花梁反披葉蓮井倒垂房  
徒然思鷺賀無以預鷗翔

園庭

杖鄉從物外養學事閒郊窮愁方汗簡無遇始觀爻谷  
寒已吹律簷空更剪茅樵隱恒同路人禽或對巢水蒲  
開晚結風竹解寒苞古槐時變火枯楓乍落膠倒屣迎  
懸榻停琴聽解嘲香螺酌美酒枯蚌藉蘭肴飛魚時觸  
釣翳雉屢懸庖但使相知厚當能來結交

歸田

務農勤九穀歸來嘉一廛穿渠移水碓燒棘起山田樹

陰逢歇馬魚潭見灑船苦李無人摘秋瓜不直錢社雞  
新欲伏原蠶始更眠今日張平子翻為人所憐

幽居值春

山人久陸沈幽逕忽春臨決渠移水碓開園掃竹林欹  
橋久半斷崩岸始邪侵短歌吹細笛低聲汎古琴錢刀  
不相及耕種且須深長門一紙賦何處覓黃金

卧疾窮愁

危慮風霜積窮愁歲月侵留蛇常疾首映弩屢驚心稚

川求藥錄君平問卜林野老時相訪山僧或見尋有菊  
翻無酒無絃則有琴詎知長抱膝獨為梁父吟

山齋

寂寥尋靜室蒙密就山齋滴瀝泉澆路穹窿石卧階淺  
槎全不動盤根惟半埋圓珠墜晚菊細火落空槐直置  
風雲慘彌憐心事乖

望野

試策千金馬來登五大原有城仍舊縣無樹即新村水

向蘭池泊日斜細柳園涸渚通沙路寒渠塞水門但得  
風雲賞何須人事論

奉報趙王惠酒

梁王脩竹園冠蓋風塵喧行人忽枉道直進桃花源  
子還羞出驚妻倒閉門始聞傳上命定是賜中樽野  
然樹葉山杯捧竹根風池還更煖寒谷遂長暄未知  
稻梁雁何時能報恩

同顏大夫初晴

夕陽含水氣反景照河隄濕花飛未遠陰雲斂向低燕  
燥還為石龍殘更是泥香泉酌冷澗小艇釣蓮溪但使  
心齊物何愁物不齊

奉和趙王喜雨

玄霓臨日谷封蟻對雲臺投壺欲起電倚柱稍驚雷白  
沙如濕粉蓮花似洗杯驚鳥灑翼度濕雁斷行來浮橋  
七星起高堰六門開猶言祀蜀帝即似望荆臺厥田終  
上上原野自莓莓

奉和夏日應令

朱簾捲麗日翠幕蔽重陽五月炎蒸氣三時刻漏長麥  
隨風裏熟梅逐雨中黃開冰帶井水和粉雜生香衫含  
蕉葉影扇動竹花涼早菱生軟角初蓮開細房願陪仙  
鶴舉洛浦聽笙簧

詠園花

暫往春園傍聊過看果行枝繁類金谷花雜映河陽自  
紅無假染真白不須妝燕送歸菱井蜂銜上窰房非是

金爐氣何關栢殿香  
裒衣偏定好應持奉魏王

仰和何僕射還宅懷故

紫閣旦朝罷中臺夕奏稀  
無復千金笑徒勞五日歸  
步簷朝未掃蘭房晝掩扉  
苔生理曲處網積迴文機  
故瑟餘弦斷歌梁秋雁飛  
朝雲雖可望夜帳定難依  
願憑甘露入方假慧燈輝  
寧知洛城晚還淚獨沾衣

送吳法師葬

龍泉今日掩石洞  
即時封玉匣  
摧談柄懸河落辯鋒  
香



鑪猶是柏麈尾更成松郭門未十里山迴已數重尚聞  
香閣梵猶聽竹林鐘送客風塵擁寒郊霜露濃性靈如  
不滅神理定何從

對宴齊使

歸軒下賓館送蓋出河堤酒正離杯促歌工別曲悽林  
寒木皮厚沙迴雁飛低故人儻相訪知余已執珪

聘齊秋晚館中飲酒

欣茲河朔飲對此洛陽才殘秋欲屏扇餘菊尚浮杯漳

流鳴二水日色下三臺無因侍清夜同此月徘徊

冬狩行四韻連句應詔

三川羽檄馳六郡良家選觀兵細柳城校獵長楊苑驚雉逐鷹飛騰猿看箭轉鳴笳河曲還猶憶南皮返

入道士館

金華開八景玉洞上三危雲袍白鶴度風管鳳凰吹野衣縫蕙葉山中簦笋皮何必淮南館淹留攀桂枝

率爾成詠

昔日謝安石求為淮海人彷彿新亭岸猶言洛水濱南  
冠今別楚荆王遂遊秦倘使如楊僕寧為關外人

奉和賜曹美人

月光如粉白秋露似珠圓絡緯無機織流螢帶火寒何  
年迎弄玉今朝得夢蘭訝許能含笑芙蓉宜熟看

和趙王看妓

綠珠歌扇薄飛燕舞衫長琴曲隨流水簫聲逐鳳凰細  
縷纏鐘格圓花釘鼓牀懸知曲不誤無事畏周郎

就蒲州使君乞酒

蕭瑟風聲慘蒼茫雪貌愁烏寒棲不定池凝聚未流蒲  
城桑葉落灞岸菊花秋願持河朔飲分勸東陵侯

詠春近餘雪應詔

送寒開小苑迎春入上林絲條變柳色香氣動蘭心待  
花將對酒留雪擬彈琴陪遊愧並作空見奉恩深

奉和初秋

落星初伏火秋霜正動鐘北閣連橫漢南宮應鑒龍祥

驚棲竹實靈蔡上芙蓉自有南風曲還來吹九重

詠畫屏風詩二十首

俠客重連鑣金鞍被桂條細塵郭路起驚花亂眼飄酒  
醺人半醉汗濕馬全驕歸鞍畏日晚爭路上河橋

浮橋翠蓋擁平旦雍門開石崇迎客至山濤載妓來水  
紋恒獨轉風花直亂迴誰能惜紅袖寧用捧金杯

停車小苑外下渚長橋前澀菱迎擁楫平荷直蓋船殘  
絲繞折藕芰葉映低蓮遙望芙蓉影只言水底然

昨夜鳥聲春驚鳴動四隣今朝梅樹下定有詠花人流  
星浮酒泛粟瑱繞杯脣何勞一片雨喚作陽臺神

逍遙遊桂苑寂絕到桃源狹石分花逕長橋映水門管  
聲驚百鳥人衣香一園定知歡未足橫琴坐石根

三春冠蓋聚八節管絃遊石險松橫植巖懸澗豎流小  
橋飛斷岸高花出迴樓定須催十酒將來宴五侯

高閣千尋起長廊四注連歌聲上扇月舞影入琴弦澗  
水纔窗外山花即眼前但願長歡樂從今盡百年

日晚金槌絡朱軒流水車轆拂綠堤柳鶯飄夾路花定  
迎劉碧玉將過陰麗華非是高陽路莫畏接離斜

裊裊出桂苑徙倚就花林下橋先勸酒跂石始調琴蒲  
低猶抱節竹短未空心絕愛猿聲近惟憐花徑深

千尋木蘭館百尺芙蓉堂落日低蓮井行雲礙芰梁流  
水桃花色春洲杜若香就階猶不進催來上伎牀

搗衣明月下靜夜秋風飄錦石平砧面蓮房接杵腰急  
節迎秋韻新聲入手調寒衣須及早將寄霍嫖姚

出沒看樓殿間關望綺羅  
翔禽逐節舞流水赴絃歌  
細管吹簾竹新杯捲半荷  
南宮冠蓋下日暮風塵多

玉柙珠簾捲金鈎翠幔懸  
荷香薰水殿閣影入池蓮  
平沙臨浦口高柳對樓前  
上橋還倚望遙看採菱船

高閣千尋跨重簷百丈齊  
雲度三分近花飛一倍低  
吹簫迎白鶴照鏡舞山鷄  
何勞愁日暮未有夜烏啼

度橋猶徙倚坐石未傾壺  
淺草開長埗行營繞細厨  
沙洲兩鶴迴石路一松孤  
自可尋丹竈何勞憶酒壚



上林春逕密浮橋柳路長龍媒逐細草鶴氅映垂楊水  
似桃花色山如甲煎香白石清泉上誰能待月光

白石春泉滿黃金新埒開戚里車先度蘭池馬即來落  
花承舞席春衫拭酒杯行厨半路待載妓一雙迴

將軍息邊務校尉罷從戎池臺臨戚里絃管入新豐浮  
雲隨走馬明月逐彎弓比來多射獵惟有上林中

三危上鳳翼九坂度龍鱗路高山裏樹雲低馬上人懸  
巖泉溜響深谷鳥聲春住馬來相問應知有姓秦

聊開鬱金屋暫對芙蓉池水光連岸動花風合樹吹春  
杯猶雜泛細菓尚連枝不畏歌聲盡先看箏柱欵

梅花

當年臘月半已覺梅花開不信今春晚俱來雪裏看樹  
動懸冰落枝高出手寒早知覓不見真悔著衣單

寄徐陵

故人倘思我及此平生時莫待山陽路空聞吹笛悲

寄王琳

玉關道路遠金陵信使疎獨下千行淚開君萬里書

和劉儀同臻

南登廣陵岸迴首落星城不言臨舊浦烽火照江明

和庾四

離關一長望別恨幾重愁無妨對春日懷抱只言秋

和侃法師別詩

秦關望楚路灞岸想江潭幾人應落淚看君馬向南  
迴首河堤望春春嗟離絕誰言舊國人到在他鄉別

秋日

蒼茫望落景羈旅對窮秋  
賴有南園菊殘花不解愁

賦得集池雁

逢風時迴度逐侶乍爭飛  
猶憶方塘水今秋已復歸

秋夜望單飛雁

失羣寒雁聲可憐  
夜半單飛在月邊  
無奈人心復有憶  
今暝將渠俱不眠

石倉歷代詩選卷十二